

Emprendistas ed emprendists da l'EMS fan experientschas custaihlas a l'exteriur

■ (cp) Era quest onn èn 11 emprendistas ed emprendists da l'EMS ids durant ils mais da stad or en il mund per lavurar en tschintg differents pajais en sedias da la gruppa EMS e rimnar experientschas preziasas. Cun il project «emprendissadi mobil» dat l'EMS la schanza unica a sias emprendistas e ses emprendists da rimnar novas experientschas durant in segiurn a l'ester da dus fin trais mais en ina da las 26 sedias da l'EMS en 16 pajais. En il center na stat betg mo la finamira da consolidar en la pratica la materia emprendida e d'applitgar linguas estras, mabain oravant tut er il svilup personal. La participaziun ad in project da mobilitad mundial mussa l'avertadad envers il nov e dat a mintga spezialist u manader futur experientschas custaihlas. Da savair s'arranschar gia en la vegliadetgna da teenager en in ambient ester – e quai a moda autonoma e lunsch davent da chasa – è in'experientscha preziosa per l'avegnir professional e privat.

Uschia han era quest onn 11 emprendistas ed emprendists da l'EMS nizzegià la schanza unica ed han lavurà en sedias da l'EMS en l'USA, la China, la Gronda Britannia, la Germania e la Brasilia. L'entusiassem è stà grond. En spezial las lavurs da project pretensiusas en ils manaschis da l'EMS, las turas d'exploraziun en citads cun milliuns abitants sco Shanghai, in afternoon tea tradiziunal en l'Engalterra u las attracziuns en Brasilia han laschà enavos experientschas ed impresziuns durablas tar las emprendistas ed ils emprendists da l'EMS. *Igor Ribeiro* dad Eigias, logisticher en il 2. onn d'emprendissadi, ha ditg suenter ses return: «Jau hai pudì impunder fitg bain mias enconuschientschas profesionalas logisticas ed hai exequì correctamain las differents incumbensas. Cun mias experientschas da la Svizra hai jau adina puspè pu-

di dar buns impuls en connex cun l'emballadi e la plastificaziun ed en l'administraziun da l'inventari dal deposit. Quai han ils collavuratur locals apprezzà fitg.» La directura dad Eftec Brasilia Ltda., *Talita Bondioli*, è da l'avis che l'emprendissadi mobil saja fitg prezios. Er en il futur prenda ella gugent emprendistas ed emprendists da l'EMS. Ella è persvasa ch'ella po profitar fitg dal know-how da las emprendistas e dals emprendists svizzers.

Er ils dus emprendists da l'EMS *Matthias Boller* da Razèn (manader d'indrizz en il 2. onn d'emprendissadi) e *Tim Germann* da Favugn (automaticher en il 3. onn d'emprendissadi) han cumprovà lur competenzas emprendidas en il mintgadi da lavur. A Sumter (South Carolina, USA) han els duvrà lur know-how tecnic. Els han lavurà en la polimerisaziun ed en il compounding. Ultra da collavurar en la producziun da granulat han els midà filters e bischens ch'els han modifitgà sez en il lavuratori. In'incumbensa speziala è stada da surlavurar las proceduras da test. Els han documentà las proceduras existents en connex cun la segirezza da lavur e fatg propostas da meglieraziun. «Noss collegas da lavur americans han apprezzà en emprima lingia nossa savida tecnica en ils secturs producziun ed electrotecnica ed en general nossas cumpetenzas fundamentalas mecanicas. Els han savens passentà lur temp liber cun nus ed uschia avain nus er emprendi d'enconuscher la vita da famiglia americana», quinta Boller. El è stà impressiunà da las grondas purziuns da tschaveras che vegnan servidas en l'USA: «En Svizra avessan trais persunas avunda cun in tal menu. En l'America èn las dimensiuns en blers regards incrediblamain bler pli grondas che tar nus en Svizra!» Sis emprendistas ed emprendists da l'EMS han absolvi lur emprendissadi mobil questa stad en la se-



Igor Ribeiro durant la lavur sin il plunader a Santana de Parnaiba, Brasilia.

FOTO EMS-CHEMIE

dia da l'EMS chinaisa a Suzhou ed han emprendi d'enconuscher las normas socialas da la cultura – per els estra – da l'Asia. Els èn tuts en il 3. onn d'emprendissadi ed han dumagnà questa situaziun nunusitada cun bravura.

«Noss collegas da lavur chinesis ed ils indigens avain nus emprendi d'enconuscher sco persunas fitg servetschavlas ed amiaivlas. Els han gidà nus da leger tavlas da traffic e tavlas d'avis ed han mussà grond interess per nossa vita en Svizra», di *Ursin Gehrig* da Domat (constructur en il 3. onn d'emprendissadi). L'entschatta han ils emprendists svizzers gi in pau difficultads cun las temperaturas chaudas en China. *Daniel Tobler* da Tusaun (polimecanist en il 3. onn d'emprendissadi) ha fatg ensemen cun *Gian-Andrea Fontana* da Clugin (constructur d'indrizz e d'apparats) lavurs da manteniment interessantas sco per exempel reparar ina roda cellulara. *Jan Degonda*

da Laax (tecnolog da materias sinteticas en il 3. onn d'emprendissadi) è stà intgantà dals indrizz moderns al lieu. El ha dastgà accompagnar ils collegas durant trais visitas tar clients ed ha uschia emprendi d'enconuscher meglier las usanzas profesionalas asiaticas. Vi da las tschaveras han els tuts stui s'endisar. «Noss plashair per insects e differents fritgs da mar è stà limità l'entschatta. Da mangiar cun bastunets è medemamain stà ina sfida», ha ditg Degonda. Ma suenter avair trenà insaquants dis sajan els stads disads vi dals usits chinesis. *Andrina Marugg* da Prüz (mediamaticra en il 3. onn d'emprendissadi) ha lavurà questa stad tar l'Ems Chemie UK Ltd. a Stafford. Ella ha gi la chaschun da far lavurs da grafica e projects da marketing. Ina da sias incumbensas principalas è stà da crear il magazin davart materia sintetica Eureka. «Mes collegas da lavur èn stads fitg amiaivels e servetschavels. Els han gidà mai

fitg a la lavur, èn vegnids cun mai a far cummissiuns u m'han mussà privat numerusas attracziuns. Uschia sun jau ma sentida spert bler meglier uschè lunsch davent da chasa», lauda Marugg. «Da tut las sedias rapportan nossas emprendistas e noss emprendists da l'ospitalitad e dal fatg ch'els han pudì s'integrar spert en las culturas estras. Quai ma fa grond plashair», di *Markus Büchi*, il manader dal personal da l'Ems Chemie AG. Las experientschas da vita singularas en il rom dal project «emprendissadi mobil» enritgeschan il «satgados» privat da mintga emprendista e mintga emprendist da l'EMS che ristga da far il grond pass or en il mund.

L'avertadad per il nunenconuscent ed autras culturas e la perdita da retenientschas èn in grond avantatg per ils giuvenils en vista a lur svilup personal ed il schlargiament da lur perspectivas professionali tar l'EMS.